



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

*Komunikadu Imprensa*  
*Parlamentu Nasionál*  
**14 Abril 2015**

**CAC apresenta relatóriu anual ba Parlamentu Nasionál: JSMP lamenta ho interferénsia Governu iha prosesu investigasaun ba kazu korupsaun sira**

Iha reuniaun plenaria Parlamentu Nasionál iha 14 Abril 2015 ho Ajenda Nú. 230/III (3<sup>a</sup>) ne'ebé prezide hosi Viseprezidente Parlamentu Nasionál, deputadu Aderito Hugo, diskuti kona-ba vizita ofisiál Prezidente Repúblika ba Indonézia no apresentasaun relatóriu Komisaun Anti-Korrupsaun kona-ba atividade 2014 nian.

Alende ajenda prinsipal rua ne'e, plenariu mós diskuti asuntu bainbain sira hanesan justifiksaun falta, apresiasaun relatóriu vizita, deklarasaun polítika bankada parlamentár, informasaun diversa no informasaun hosi Sekretaria Estadu Asuntu Parlamentár.

Depoide votasaun ba vizita ofisiál Prezidente Repúblika nian, Plenaria hahú kedas ho rona apresentasaun relatóriu CAC nian. Delegasaun CAC kompostu hosi Komisáriu CAC, Dr. Aderito Tilman no Adjuntu Komisáru na'in rua, Dr. Manuel Bucar no Dr. Jose Neves.

Iha apresentasaun ne'e, aleinde temi objetivu, programa no atividade CAC nian ne'ebé konsege realiza iha 2014, CAC mós temi obstákulu boot sira ne'ebé CAC hasoru. Tuir relatóriu ne'ebé relata direktamente hosi Komisáru CAC, iha obstákulu boot rua. Obstákulu dahuluk mak iha intervesaun direta hosi Governu liuhosi karta hodi impede investigasaun ba kazu korrupsaun balun no obstákulu daruak mak la dun iha kooperasaun di'ak entre instituisaun Estadu balun hodi fornese dokumentu ne'ebé CAC husu.

“JSMP lamenta tebes ho atitude hosi autoridade ezekutivu nian ne'ebé halo intervensaun direta ba servisu setór justisa no la iha vontade di'ak hodi koopera iha fornese dokumentu no informasaun ba CAC hodi fasilita investigasaun ba kazu korrupsaun sira,” dehan Luis de Oliveira Sampaio”, Diretór Ezekutivu JSMP.

JSMP enkoraja atu CAC atu nafatin kaer mentin prinsípiu harii governasaun di'ak no moos no bazeia ba enkuadramentu legál ne'ebé iha no independentemente kontinua investiga kazu korrupsaun sira.

JSMP husu ba autoridade estadu tomak atu evita halo interferénsia ba servisu instituisaun demokratiku sira ne'ebé hari'i atu kombate korupsaun no hametin governasaun diak nomós iha Timor-Leste. JSMP mós rekomenda atu Parlamentu Nasionál bele tau iha prioriedade ezbosu Lei Anti-Korrupsaun atu bele diskute no aprova lalais, nune'e bele haforsa tan servisu CAC nian iha futuro.

Atu hetan informasaun kle'an favór kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

Landline: 3323883 / 77810637